

Kompas Spiritual

Yanüari 2010


edishon 1



Den e edishon aki

- 1 Introdukshon
 - 2 Kontinuashon di Introdukshon
 - 2 Pa Bo Sa (desaroyo spiritual)
 - 3 Kontinuashon Pa Bo Sa
 - 3 Un Bunita mensahe pa 2010
 - 4 Orashon di San Fransisko
di Asis
 - 4 ¿Cuál es entonces la
función del jefe? ¿Mandar?
- ☺ Athunto: Aktivitat Spiritual
- ☺ " E otro kampvür "

*Mi por enfrentá tur kos
pa medio di esun ku ta
duna mi forsa (Fil 4:13)*



Introdukshon:

Bo dilanti bo tin e promé edishon di nos "kompas spiritual". Kompas Spiritual ta e nòmber ku Komishon Pastoral di Scouting Antiano a skohe pa e boletin informativo ku e komishon aki lo publiká ku regularidat. Kompas Spiritual ta intensioná komo un boletin, na promé lugá pa lidernan di Scouting Antiano, karga ku informashon pa sostené desaroyo spiritual di e lidernan mes i tambe pa nan trabou komo lider. Kompas Spiritual lo kontené informashon di aktividatnan di Komishon Pastoral i CICE, pero tambe un rúbrika litúrgiko, aktivitat spiritual ku lo por hasi ku e muchanan i hopi mas.

E intension ta pa distribuí Kompas Spiritual via email i website. Riba papel, Kompas Spiritual lo ta disponibel den Scout Shop. Segun aktividatnan di Scouting koinsidí ku publikashon di Kompas Spiritual, Komishon Spiritual lo hasi uso di e oportunidat i parti kopia di e boletin aki.

Den e promé edishon aki nos ke introdusi Komishon Pastoral na boso.

Antes "Katholieke Verkenners" (KV) tabatin kontakto ku CICE. Esaki a mengua ora a forma Scouting Antiano na 1997.

Na yanüari 2003 e delegashon di Scouting Antiano na e kumbre Inter Amerikano di Scout na Chile, a papia ku CICE. E delegashon aki tabata konsistí di Ariadna Schoop i Daniel Corsen. Aki a inisiá un proseso pa Scouting Antiano afiliá na CICE.

Na aña 2005 e sekretario mundial di CICE, señor Herman Baldur a bishita Kòrsou. Un delegashon di Scouting Antiano a hiba Herman di bishita serka Gobernador i Obispu.

Kompas Spiritual

Yanüari 2010

Korto tempu despues Obispu a nombra Pastor Carlos Vivas komo Kapelan pa Scouting Antiano.

Despues e relashon a manera fria un poko. A sigui basta interkambio i komunikashon via email i telefon. Pero den Scouting Antiano mes e proseso aki a drumi un poko.

Djis promé ku konferensha regional merikano di Scouting, na novèmber 2007, a drenta e notisia ku CICE ta rekonosé Scouting Antiano komo miembro kompletu di CICE, apesar ku Scouting Antiano no ta un miembro pleno di e organisashon mundial di Scouting.

Klaro ku na kas tambe mester a kuminsá move. A aktivá un Komishon Pastoral i a aserka Pastor Vivas pa reaktivá e proseso. Pastor Vivas ya no tabata por a sigui ku e tarea di Kapelan pa Scouting Antiano i a aserka Obispu pa nombra un otro Pastor komo Kapelan. Esaki a bira pastor Morrison.



Miembronan di Komishon Pastoral di Scouting Antiano ta na disposishon di tur lider di Scouting Antiano pa kualkier pregunta, sugerensha, òf sosten ku mester relashoná ku formashon spiritual, tantu di e muchanan komo di e lider mes.

Nòmber	Telefon
Kapelan	Pastor Morrison
Daniel Corsen	5112287 - 4632512
Idylliene Corsen	6634048 - 8689871
Eslin Martha	5616248 - 4654629
Hubert Martha	5605039 - 4654629
Rolando Manuel	5624947 - 8692947
Titsa Villarreal	6693177 - 4621713
Gilda Zalm	6995265

Den nos próksimo Kompas Spiritual nos lo bin ku informashon di CICE.

Pa bo Sa (desaroyo spiritual)

Rumannan Scout, den e rúbrika aki nos lo trata tópikonan pa yuda bo kompandé nos fe katóliko mihó. Nos ta boga pa nos tin katólikonan Bibu, Fiel i Outéntiko. Unda ta e promé kaminda ku nos ta enkontra ku Hesus? Den Santa Eukaristia. Pa e motibu aki nos ta kuminsá ku splika e importansha di bai misa. Tin hende ta bisa mi no mester bai misa. Na kas mes mi ta resa ami ku mi Dios. Sin ke kita nada for di e importansha di resa na kas i sigur den famia, tòch ta keda imperativo pa bai misa.



Kompas Spiritual

Yanüari 2010

Dios ta Amor



E di tres mandamentu ta Santifiká dia di Señor. E mandamentu aki ta manda ku nos mester partisipá na Santu Sakrifisio di Misa tur djadumingu i fiestanan warda.

Nos promesa komo Scout ta kumpli ku mi deber pa ku Dios. Un di nos debenan pa ku Dios ta kumpli ku su mandamentunan. Pues rumannan Scout ban kumpli ku nos deber i bai Misa tur djadumingu. Si nos sa i ta bon konsiente ku ta Hesus ta presente den Santa Eukaristia nos lo mester sali bai kontr'é por lo ménos tur djadumingu. Bai Misa. Wak echanan di apòstel 20,7

Djadumingu ta e dia riba kua nos Señor Hesu Kristu a resusitá fo'i morto. E palabra aki ta nifiká "Dia di Señor" pasombra El a vense morto i piká. E ta e dia di deskanso di trabou pa por dediká na Dios, pa selebrá ku fe i deboshon Santa Eukaristia, pa pensa un ratu mas riba nos mes bida spiritual, pa dediká atenshon speshal na nos famia i pa kumpli ku obranan spiritual i temporal di misericordia. E ta un dia masha special i ta e sentro di aña litúrgiko, ta manera un selebrashon di Pasku di Resurekshon di kada Siman. ¹ Kada tempu di aña tin un definishon. Nos ta yama esaki e kalènder Litúrgiko. E dia nan aki nos ta bibando den e tempu di Pasku di Nasementu (e ta e di promé siman di Atvènt te ku Boutismo di Hesus djadumingu dia 10 di yanüari. Despues ta sigui tempu den aña 1, esei ta kuminsá djaluna dia 11 di yanüari e ta dura te djarason di shinishi, 17 di febrüari. Durante e tempunan aki por tin un òf otro santu ku nos ta selebrá.

Te aki e promé edishon di pa bo sa. Den e siguiente edishon nos lo trata e Santu Sakrifisio di Misa i e nifikashonnan.

¹ Katesismo di Iglesia Katolika, Mat 28, 1, Mark 16, 2,9, Huan 20, 1, 9

The good man brings
good things out of
the good stored up
in his heart...

Luke 6:45



Un Bunita Mensahe pa 2010

**Pasenshi ta un don ku bo mester tin hopi pasenshi pa
desaroy'é,**

**asta ora bo kere bo ta kla kuné lo bo pèrd'é, paso bo a
stòp e desaroyo.**

Outor: Roderik Macarius

Kompas Spiritual

Yanüari 2010

Si boso konfia, boso lo risibí tur loke boso pidi den Orashon. (Mateo 21:22)



*¿Cuál es entonces la función del jefe?
¿Mandar?*

Orashon di San Fransisko di Asis

“Señor,
Hasimi bira un instrumento di bo pas.
Lagami trese amor,
kaminda tin odio.
Lagami trese pordon,
kaminda tin pleitu.
Lagami trese bèrdat,
kaminda tin eror.
Lagami trese speransa,
kaminda tin desesperashon.
Lagami trese klaridat,
kaminda tin skuridat.
Lagami trese alegria,
kaminda tin tristesa.
Señor,
Hasimi buska mas tantu pa konsolá
ku pa ser konsolá,
mas tantu pa komprondé,
ku por ser komprondé,
mas tantu pa stima
ku pa ser stima.

Amèn”

Por MS Jorge R. Castagna.
Jefe de los scouts de Santa Inés
Scouts de Argentina

¿Cuál es entonces la función del jefe? ¿Mandar?

El líder tiene, al igual que todos, la misma misión que Jesús: servir y salvar, como Jesús lo hizo. El jefe debe llevar amor, traer amor, distribuir amor, compartir el amor, contagiar amor y si aún le queda tiempo brindar amor.

¿Quien es entonces el que toma las decisiones?
Es evidente. Si el amor recibe, comprende, escucha, ve, abraza, da luz y calor; es sin duda, el único indicado para tomar decisiones correctas.

El jefe no es el que más manda, sino el que más ama.



E OTRO KAMPVÜR

Area di desaroyo
SPIRITUAL



DESKRIPSHON DI E AKTIVIDAT

Durante un kampvür, debidamente prepará, den un ambiente ku kanto, e partisipantenan lo diskutí i profundisá riba e pakiko i e kontenido di nos lei di Scout.

META DI E AKTIVIDAT

1. Kapturá e lei di Scout dor di duna un relevansia na e balornan ku e lei ta ekspresá.
2. Biba e lei di Scout den e bida di tur dia.
3. Struktura e partisipante su konsepto di balornan.
4. Oportunitat pa ekspresá emoshon, balor i kiko bo ta kere aden.
5. Konosé otro mihó atraves di nan balornan i kreensha.

E TA KONTRIBUÍ NA LOGRO DI E SIGUIENTE OPHETIVONAN EDUKATIVO

Rowan

1. Mi ta komprondé e nifikashon di e Lei i Promesa Scout.
2. Mi ta respetá i kuida naturalesa pasombra mi ta sintimi responsabel pa e kreashon di Dios.
3. Mi ta kompartí mi eksperensha spiritual ku otro hóben.
4. Mi ta desaroyá un aktitut kritiko kontra ekspreshonnan di balornan ku no ta kuadra ku esnan di Scouting.
5. Mi por ekspresá mi opinion sin ofendé òf humiá otronan.
6. Mi ta purba aktua segun mi balornan.
7. Mi ta fiel na mi palabra.
8. Mi ta skohe konsiente pa e balornan ku lo rigi mi bida.
9. Mi ta renobá mi kompromiso ku e movimentu Scout.

MATERIAL

Ingrediente pa traha “Chapati” (wak e reseta), un kampvür na un lugá konfortabel, kantikanan moderno (no esnan tradishonal di kampvür, no mester pero nan por ta kantikanan spiritual), bliki grandi, jerry can, baki di plèstik etc ku por wòrdu usa komo “tam tam”.

Pèn, papel, bela (di 8 ora) i instrukshon por eskrito pa kada partisipante.

LUGÁ

Un lugá den naturalesa kaminda por tene un kampvür. Preferibel un lugá deskonosi pa e partisipantenan.

DURASHON

Dos ora di preparashon i durashon di e kampvür mes ta depende di e kantidat di partisipante.

PARTISIPANTENAN

Un of mas Unidat di Rowan pero no mask u 30 partisipante.

DESAROYO DI E AKTIVIDAT

E aktivitat aki ta intenshoná pa duna e partisipante un oportunitat pa kapta e nifikashon berdadero di e balornan proponé den e Lei i Promesa Scout i kon e por usa esaki den su bida di tur dia. Si e partisipante ya a eksperensha aspektonan di e Promesa i Lei den su bida, esaki lo hasi e aktivitat aki mas relevante ainda.

Komo lider, puntra bo mes si bo a introdusí e balornan di e Lei di Scout den bo aktivitatnan. Por ehèmpel: Bo ta insistí pa kuida naturalesa? Bo ta buska solushon ora muchanan ta tenta otro òf ekskluí un mucha? Bo ta stimulá koperashon?

E kampvür lo mester tuma lugá ora ta skur. E promé parti (e preparashon) por tuma lugá kualkier momento. No mester ta e dia di e kampvür mes.

E promé parti: Preparashon (1 ora).

Parti e grupo di partisipante den tres grupo mas chikí. Kada grupo ta haña un tarea. Un grupo ta prepará e “chapati” (wak e resta), e di dos grupo ta prepará e kampvür (konfortabel, kla pa sende) anto e di tres grupo ta prepará e kantikanan (kantikanan moderno ku tur hende konosé, kopia e letra pa tur partisipante, por ta kantikanan spiritual).

E di dos parti: Djis promé ku e kampvür (50 minüt).

Ora tur hende tei e partisipantenan ta kuminsá kana bai den direkshon di un lugá deskonosí, nan ta wòrdu guia dor di zonido di tambú. E ruta ta dørna ku flambeau i bela. Ora tur hende yega na e sitio nan ta haña un bela (ku nan lo sende), pèn, papel i un dokumento ku instrukshon (wak anekso). Kada partisipante lo buska un lugá ketu i solitario (no muchu leu) i nan lo mester reuní bèk na e sitio di e tambú, ku un pida palu, asina nan tende e tambú atrobe.

Kada partisipante ta keda 20 minüt su so pa reflekshoná riba nos Lei di Scout. Lidernan lo pasa di hóben pa hóben pa kontesta eventual pregunta.

Despues di e 20 minüt e tambú ta kuminsá zona atrobe. E partisipantenan ta reuní atrobe kaminda e tambú ta. Kada un partisipante ku yega ta kuminsá toka ku e pida palu ku e a trese riba un tambú (bliku grandi, jerry can, baki di plèstik etc.). Esaki ta sigui te ora tur partisipante tei i nan ta tokando huntu.

Ora tur hende tei ta pone tur material huntu i kada partisipante ta warda su papel. E grupo enkargá ku e kampvür ta bai na e lugá di e kampvür pa prepará sendementu di esaki. Despues e grupo ku a prepará e “chapati” ta bai i por último e grupo ku a prepará e kantikanan. No manda tur hende pareu pa e ambiente keda trankil i di serenidat.

E di tres parti: E kampvür.

Ku tur hende presente ta habri e kampvür ku e seremonia tradishonal. Despues lidernan ta kuminsá guia e programa. Unu ta dirigí e diskushon i un otro ta tuma nota. Ta kuminsá ku un òf dos kantika.

Despues e lider ta puntra si un partisipante ke kompartí su pensamentu tokante kualkier parti di e Lei di Scout ku mas ta apelá na dje òf ku mas ta influensha su komportashon. Probablemente lo reina momentu di silencio, no kere ku lo tin reakshon mesora, keda trankil i ripití e pregunta, kisas kanta un kantika mas. Un partisipante lo sali i kuminsá papia.

Despues di dos tres buèlta di partisipante kompartiando nan pensamentu, interkambiá ku kantika, por kuminsá parti e “chapati”. Ta sigui kompartí pensamentu ora kaba di parti.

Na final e lider ta sera e kampvür gradisiendo e partisipantenan ku nan a kompartí na pensamentu i duna un resúmen kòrtiku. Aki e lider por tambe papia di e Promesa i invitá esnan ku ta kla pa esaki pa hasi nan Promesa dentro di algun dia. Ata aki un ehèmpel kon pa konkluí e aktividat: “Nos ke gradisí boso tur ku a kompartí boso eksperensha i pensamentu. E balornan ku nos a diskutí di dje ta e balornan ku Scoutnan rònt mundu ta kompartí. Komo Scout nos mester purba na biba e balornan aki mas tantu posibel. Mi ke invitá tur esnan ku ke hasi nan Promesa pa hasi esaki. Klaro ku nos komo lider lo tei pa yuda boso tur ora durante e preparashon pa hasi e Promesa pero tambe despues pa kumpli ku e Promesa. Pronto nos lo prepará esaki.

Por último ta sera e kampvür na e forma tradishonal i kada grupo di partisipante ta “ruim op” nan parti.

Komentario:

Si ta nesesario splika e partisipantenan adelante algun regla kon pa hiba un diskushon. Tur opinion ta importante i mester respetá lokual un otro bisa. No ta hari ni tenta otro.

No ta nesesario pa yega na un konsenso. Pues no tin nodi di puntra “Tur ta di akuerdo?”. Si ta bon pa e lider stimulá reashon òf pregunta riba kualkier ponensha pa asina stimulá e interkambio.

Si durante e diskushon e remarke bin dilanti ku sierto balor no ta wòrdu práktika den grupo, usa e oportunidat pa puntra e partisipantenan mes kon por introdusí e balor aki den grupo.

Posibel variashon:

Na lugá di kuminsá e diskushon ku e pregunta: “ken ke kompartí su pensamentu tokante kualkier parti di e Lei di Scout ku mas ta apelá na dje òf ku mas ta influensha su komportashon?” Por

kuminsá dor di puntra pa e parti di Lei ku ta ménos komprendibel òf esun mas difísil pa práktika òf esun ku nan mes no ta di akuerdo kuné.

E aktividat aki por wòrdu usa pa adul-tonan tambe.

Reseta di “Chapati”

Chapati ta un kuminda Indio outéntiko. E ta forma parti integral di un plato Indio komun. Chapati ta konosí tambe komo “roti” òf “parantha”.

Pa traha Chapati pa 8 persona mester di:

- 2 kùp di ariña (Wheat Fluor).
- 1 kuchara di Ghee (manteka líkido)
- 1 kuchara di salu.
- Awa.

Preparashon:

Brua e manteka, ariña i salu huntu ku suficiente awa pa krea un mansa suave. Laga e mansa para pa 1 ora.

Traha bala pareu di e mansa. Hunta esakinan ku ariña seku i plat esakinan. Keinta un plancha i pone e chapati riba e plancha.

Parsialmente roster e chapati, tur dos banda, riba e plancha.

E chapati ta kla.



Dokumentu ku instrukshon pa partisipante na:

E Otro Kampvür

Promesa di Rowan:

Komo Rowan mi ta primintí di kumplí ku mi deber pa ku Dios i mi Pais. ta dispuesto pa yuda otro i obedesé Lei di Rowan.

Lei di Rowan:

Un Rowan ta un bon amigu, semper korekto, simpel, spòrtif, independiente i servisial.

Un Rowan, ounke den difikultat, sa di perserverá, obedesé i respetá otronan i e mes.

Reflehá riba e siguiente preguntanan:

1. Kua punto (nan) den e Lei di Rowan ta kuadra mas ku bo estilo di bida? Kua ta esun ku mas bo ta identifiká bo mes kuné?
2. Kiko lo bo ke kambia den e Lei aki pa e kuadra mas tantu ku e balornan ku abo ta para p'e? Kisas un òf mas palabra?
3. Tin mas kos ku lo bo pone aserka?
4. Tin punto (palabra) ku abo lo saka afó?
5. Bo ta sinti ku bo ta kla pa hasi e Promesa di Rowan? Si ya bo a hasi e Promesa di Rowan, bo ta kumpliando ku e Promesa aki?

Aki ratu, durante un kampvür lo bo tin oportunitat pa kompartí bo opinion i pensamentu tokante e Lei di Rowan. E papel aki ta keda pa abo.